

四庫全書

史部

欽定四庫全書

史部
竹書統箋卷十一

詳校官編修

臣范來宗

洗馬臣王坦修覆勘

總校官進士

臣繆琪

校對官主簿

臣汪日贊

謄錄監生

臣王寶唐

欽定四庫全書

竹書統纂卷十一

翰林院檢討徐文靖撰

匡王

名班。○箋按周本紀項王六年崩子匡王班立。

元年己酉

箋按春秋魯文公十五年也。

六年晉靈公為趙穿所殺

箋按左傳宣二年秋九月乙丑趙穿攻靈公于桃園宣子

未出山而復太史書曰趙盾弑其君以示于朝宣子曰不然對曰子為正卿亡不越竟反不討賊非子而

誰杜注穿趙盾之從父昆弟子乙丑九月二十七日

趙盾使穿迎公子黑臀于周立之

箋按僖公二十三年傳狄人伐虜咎如獲

其二女叔隗季隗納諸公子公子取季隗以叔隗妻趙衰生盾杜注盾趙宣子又宣公二年傳宣子使趙

穿迎公子黑臀于周而立之林氏曰黑臀晉文公子晉世家云迎襄公弟黑臀于周也

王陟

箋按春秋宣二年冬十月乙亥天王崩舊本竹書以趙穿弑靈公係王陟之下今依春秋傳冬不當

在秋前也故改正之

定王

名瑜○箋按周本紀匡王六年崩弟瑜立是為定王

元年己卯

晉成公元年箋按己當作乙

六年晉成公與狄伐秦獲秦謀殺之絳市六日而蘇

按箋

左傳宣八年春白狄及晉平夏會晉伐秦晉人獲秦謀殺諸絳市六日而蘇晉世家成公六年伐秦虜秦將赤索隱曰赤即斥謂斥堠之人宣八年傳晉伐秦獲秦謀殺諸絳市蓋彼謀即此赤也晉成公六年與魯宣八年正同故知然也

七年晉成公卒于扈

箋按春秋宣九年秋九月晉侯宋公衛侯鄭伯曹伯會于扈辛酉晉

侯黑臀卒于扈傳曰會于扈討不睦也陳侯不會晉荀林父以諸侯之師伐陳晉侯卒于扈乃還林注扈鄭地按郡國志卷縣有扈成亭

八年

壬戌晉景公元年○箋按晉世家成公七年卒子景公據立

十八年齊國佐來獻玉磬紀公之甌

箋按左傳成公二十二年春齊侯伐我北

鄆圍龍衛侯使孫良夫石稷寯相向禽將侵齊與齊師遇齊師乃止次于鞠居新蔡人仲叔于奚救孫桓子桓子是以免遂如晉乞師臧宣叔亦如晉乞師皆主卻獻子晉侯許之七百乘請八百乘師從齊師于莘六月壬申師至于靡笄之下齊侯使請戰癸酉師陳于鞌郕夏御齊侯逢丑父為右晉解張御卻克鄭邱緩為右齊師敗績逐之三周華不注晉師從齊師入自丘與擊馬陘齊侯使賓媚人賂以紀甗玉磬與地不可則聽客之所為賓媚人致賂晉人不可必以蕭同叔子為質而使齊之封內盡東其畝對曰蕭同叔子非他寡君之母也若以匹敵則亦晉君之母也吾子布大命于諸侯而曰必質其母以為信其若王命何且是以不孝令也晉人許之秋七月晉師及齊國佐盟于袁婁杜注媚人國佐也甗玉甗皆滅紀所得按廣川書跋有方甗銘言古者謂鼎上下大小若甗曰甗亦甗器類甗古文作甗今仲信父之銘則作

廟紀有廟齊晉以為重器然其用不過行于饗食今
舉國為重號于天下則紀侯之廟必具尤異者也

二十一年王陟

箋按是年乙亥春秋成公
五年十一月己酉天王崩

簡王

名夷○箋按周本紀定王
二十一年崩子簡王夷立

元年丙子

箋按是年夏四月
丁丑晉遷于新田

五年晉景公卒

箋按晉世家景公十二年冬齊頃公如
晉欲上尊晉景公為王景公讓不敢晉

始作六卿十九年夏景公病立其太子壽曼為君是
為厲公按景公名據春秋作孺厲公壽曼左傳作州
蒲

六年

辛巳晉厲公元年○箋按左傳魯成公十年晉侯
有疾立太子州蒲以為君而會諸侯伐鄭十一年

秦晉為成將會于令狐秦伯不肯涉河使史黶盟晉侯于河東晉卻犇盟秦伯于河西秦伯歸而背晉成十三年夏四月戊午晉侯使呂相絕秦秦桓公既與晉厲公為令狐之盟而又召狄與楚欲道以伐晉五月丁亥晉師以諸侯之師及秦師戰于麻隧秦師敗績獲秦成差及不更女父師遂濟涇及侯麗而還十五年晉三卻害伯宗及欒弗忌伯州犁奔楚十六年夏四月晉侯將伐鄭鄭人聞有晉師使告于楚楚子救鄭五月晉師濟河六月晉楚遇于鄆陵及戰射共王中目王曰天敗楚也夫余不可以待乃宵遁十七年厲公反自鄆陵欲盡去羣大夫而立其左右壬午胥童夷羊五帥甲八百將攻卻氏長魚矯以戈殺駒伯苦成叔于其位溫季趨矯及諸其車以戈殺之胥童以甲劫欒書中行偃于朝矯曰不殺二子憂必及君公曰一朝而尸三卿余不忍並也皆再拜稽首曰君討有罪而免臣于死君之惠也乃皆歸

十三年晉厲公卒

箋按左傳成十七年厲公遊于匠麗氏樂書中行偃遂執公焉十八年春

王正月庚午晉樂書中行偃使程滑弑厲公葬之于翼東門之外以車一乘晉世家厲公死十日公子周

立是為

悼公

楚共王會宋平公于湖陽

箋按楚世家莊王卒子共王審立宋世家平公三年楚共

王拔宋之彭城以封宋左師魚石四年諸侯共誅魚石而歸彭城于宋水經注泚水出泚陽東北太湖山又西至新野縣南其水西南流逕湖陽縣故城南竹書楚共王會宋平公於湖陽者矣

十四年

巳丑晉悼公元年○箋按悼公名周其大父掓晉襄公少子也號為桓叔子惠伯談生悼公周

周語曰既殺厲公樂武子使如周迎悼公庚午大夫逆于清原乃盟而入辛巳朝于武宮二月乙酉公即

位三年公始合諸侯四年諸侯會于雞丘五年諸戎來請服使魏莊子盟之於是乎始復伯

王陟

箋按春秋襄公元年九月辛酉天王崩杜氏曰辛酉九月十五日

靈王

名泄心○箋按周本紀簡王崩子靈王泄心立又靈王生而有顓初定王六年秦人降妖曰周其有

顓王亦能克脩其職諸侯服享故靈王亦稱顓王

元年庚寅

箋按通鑑綱目靈王元年冬吳壽夢來朝据吳越春秋壽夢元年朝周過楚觀諸侯禮樂

魯成公會于鍾離深問周公禮樂成公悉為陳前王之禮樂因為詠歌三代之風壽夢因嘆而去曰嗚呼哉禮也左傳成公十五年冬十一月會吳于鍾離則壽夢來朝而問周公之禮樂正成公時也成公五年定王崩六年為簡王元年則會吳鍾離在簡王十年若靈王元年魯襄公二年非成公也漢書郊祀志周

靈王即位時諸侯莫朝周長宏廼明鬼神事設射不來不來者諸侯之不來者也依物怪欲以致諸侯諸侯不從而周室愈微故知靈王元年無吳壽夢來朝之事也

十四年晉悼公卒

箋按春秋襄公十五年冬十有一月癸亥晉侯周卒晉世家悼公十五年

卒子平公彪立

十五年

甲辰晉平公元年○箋按左傳襄公十六年春葬晉悼公平公即位羊舌肸為傅張君臣為中

軍司馬祁奚韓襄欒盈士鞅為公族大夫虞丘書為乘馬御改服修官烝于曲沃警守而下會于溴梁命歸侵田以伐魯故執邾宣公莒犁比公林注十二年十四年莒人侵魯前年邾人伐魯晉將為魯討之悼公卒不克會故平公終其事又按史記年表亦以是年為甲辰靈王二十一年魯襄公二十二年孔子生

歲在巳酉据竹書則巳酉是靈王二十年魯襄二十一年也公羊傳襄公二十一年十月庚辰朔十有一月庚子孔子生何休註曰時歲在乙卯又曰何氏自有長歷不得以左氏難之然据竹書則魯襄公二十一年歲在巳酉何云乙卯當從竹書及年表孔子生巳酉歲自文王既没至此共五百一十二年

二十七年王陟

箋按春秋襄公二十八年十月有二月甲寅天王崩林堯叟曰實十一月癸巳崩

而以十二月甲寅告此緩告非有事宜直臣子怠慢皇覽曰周靈王葬于河南城西周山上

景王

名賁○箋按周本紀靈王崩子景王貴立韋昭曰太子晉之弟也

元年丁巳

十三年春有星出婺女

箋按星傳婺女四星十一度在牽牛東北距西南星去極一百

四度半漢書李尋傳臣聞五行以水為本元武婺女
天地所紀終始所生孟康曰婺女須女也張揖廣雅
曰須女謂之婺女荊州占曰彗星犯婺女其邦兵起
左傳昭十年春王正月有星出于婺女鄭裨竈言于
子產曰七月戊子晉君將死今茲歲在顓頊之虛姜
氏任氏實守其地居其維首而有妖星焉告邑姜也
邑姜晉之妣也天以七紀戊子逢公以登星斯于是
乎出吾是以譏之杜注客星出非其地故曰妖星也
唐志歲星差合術曰昭公八年十一月楚滅陳史趙
曰未也陳顓頊之虛也歲在鶉火是以卒滅今在析
木之津猶將復由開元書在其八度析木津也十年
春進及婺女初在元枵之維首傳曰有星孛于婺女
是也

十月晉平公卒

箋按十月誤春秋昭公十年秋七月戊子晉侯彪卒即用夏正亦當為九月非

十月

十四年

庚午晉昭公元年。○箋按晉世家平公二十六年卒子昭公夷立。

河水赤於龍門三里

箋按水經注河水南出龍門口汾水從東來注之魏土地記曰梁山

北有龍門山大禹所鑿通孟津河口廣八十步竹書紀年晉昭公元年河水赤於龍門三里郡縣志龍門山在同州韓城縣北五十里京房曰君酒于酒淫于色賢人潛國家危殷異流水赤又曰河水赤者邑有冤

十九年晉昭公卒

箋按春秋昭公十八年秋八月己亥晉侯夷卒

冬十二月桃花

箋按五行志僖公三十三年十二月李梅實劉向以為李梅當剥落今反

華實近
草妖也

二十年

晉頃公元年○箋按晉世家昭公六年卒子頃公去疾立

二十五年晉頃公平王室亂立敬王

箋按春秋魯昭公二十二年夏四月

乙丑天王崩六月叔鞅如京師葬景王王室亂周本紀景王十八年后太子聖而早卒二十年景王愛子朝欲立之會崩子丐之黨與爭立國人立長子猛為王子朝攻殺猛猛為悼王晉人攻子朝而立丐是為敬王景王立二十三年崩自是而王室亂踰二年而立敬王故竹書總記為二十五年耳而史記云二十也年誤

敬王

名丐○箋按丐一作句春秋昭二十三年天王居于狄泉尹氏立王子朝林堯叟曰居于狄泉言未

得京師也于是王猛卒敬王即位即王猛之母弟也
居于狄泉謂之東王子朝入于王城謂之西王書曰
天王居于狄泉出子朝也

元年壬午

箋按周本紀敬王元年晉人入敬王子朝自立敬王不得入居澤四年晉率諸侯入敬王

于周子朝為臣諸侯城周十六年子朝之徒復作亂
敬王奔于晉晉定公遂入敬王于周賈逵曰澤即翟
泉地理通釋曰翟泉地自成周東北晉率諸侯之徒
修繕其城以成周城小不受王都故壞翟泉以廣焉

八年晉頃公卒

箋按春秋昭公三十年夏六月庚辰晉侯去疾卒秋八月葬晉頃公晉世家頃

公卒子定公午立

九年

庚寅晉定公元年。箋按晉定公元年魏舒為政
定三年舒卒范鞅為政定十四年晉逐范中行氏

趙鞅歸于晉自是晉知氏韓氏
趙氏魏氏並強分晉之勢成矣

十四年漢不見于天

箋按晉天文志曰天漢起東方尾箕之間謂之漢津乃分為二道其

南經傳說魚天驚天并河鼓其北經龜貫箕下次絡
南斗魁左旗至天津下而合南道乃西南行又分夾
匏瓜絡人星杵造父騰蛇王良附路閣道北端大陵
天船卷舌而南行絡五車經北河之南入東井水位
而東南行絡南河闕丘天狗天紀在七星南而沒詩
倬彼雲漢昭回于天蓋謂此也敬王十四年漢乃不
見于天所以紀異也

二十六年晉青虹見

箋按蔡邕月令曰虹見有青赤之色此有青無赤故曰青虹元命包

曰世惑臣
謀虹舒照

二十八年洛絕于周

箋按水經注周書稱周公將致政乃作大邑成周于土中南係于洛

水北因于邦山竹書晉定公二十年洛絕于周

三十六年淇絕于舊衛

箋按水經注淇水出隆慮縣大號山又東逕逢都壘南世謂之

淇陽城又東分為二水左為滎水右則淇水自元甫城東南逕朝歌城北竹書晉定公二十八年淇絕于

舊衛

三十九年晉城頓丘

箋按水經注曰闕駟云頓丘在淇水南又屈逕頓丘西詩所謂送子

涉淇至于頓丘竹書紀年晉定公三十一年城頓丘史記正義曰頓丘故城在衛州頓丘縣東北三十里

輿地廣記頓丘本衛邑漢屬東郡

四十三年宋殺其大夫皇瑗于丹水之上

箋按哀十七年傳宋皇瑗

之子廩有友曰田丙而奪其兄鄭般邑以與之公執之皇瑗奔晉召之十八年春宋殺皇瑗公聞其情復

皇氏之族使皇瑗為右師

丹水壅不流

箋按水經注獲水出汭水于梁郡蒙縣北十三州志曰首受菑獲渠亦兼丹水之稱

也竹書宋殺其大夫皇瑗于丹水之上又曰丹水三日絕不流蓋汭水之變名也地鏡曰河大壅下臣執政或主大水又曰流水忽停天下飢

四十四年王陟

箋按左傳哀十九年冬叔青如京師敬王崩故也史記年表敬王四十四年崩

則少一年徐廣曰歲在甲子從史記也据竹書則在乙丑

元王

箋按周本紀敬王崩子元王仁立世本云元王名赤

元年丙寅

箋按太史公十二諸侯王年表始于周元王

晉定公卒

箋按晉世家定公在位三十三年卒子出公鑒立韋昭洞記曰周元王二年彗星見其年

魯哀

公卒

三年

晉出公元年据温公稽古錄補

四年於越滅吳

箋按地理通釋曰越見春秋凡六其三稱越皆在昭公之時其三稱於越二在

定公一在哀公之時會稽記曰少康其少子號曰於越越國之稱始此吳太伯世家吳王夫差十八年勾踐率兵使伐吳敗吳師于笠澤二十年越復伐吳二十一年遂圍吳二十三年十一月丁卯越敗吳欲遷

吳王于甬東予百家居之吳王曰孤老矣不能事君王也乃自刎死越王滅吳誅太宰嚭以為不忠而歸
据左傳魯哀公十七年越伐吳吳禦之笠澤勾踐十九年也二十年越圍吳乃勾踐二十二年也二十二年越滅吳乃勾踐二十四年首尾蓋三年矣國語曰居軍三年吳師自潰越世家亦曰留圍之三年吳師敗與左傳及太伯世家合吳越春秋曰勾踐二十一年七月越王復志國中士卒伐吳遂圍吳守一年吳師累敗遂樓吳王於姑胥之山校左傳則事在勾踐十九年非二十一年且圍守三年非一年也俱誤又按建康志云越城在江寧縣尉廨後遺址猶存人呼為越臺宮苑記云周元王四年越相范蠡所築蓋即是年也

六年澮絕于梁

箋按水經注澮水出河東絳縣東高山又西南逕虎祁宮南其宮地背汾而澮

西則兩川之交會也竹書晉出公五年澮絕于梁即此水也一統志虎亭在潞安府襄垣縣西北五十里春秋昭公八年叔弓如晉注曰賀虎祁也虎祁宮名顏師古曰虎音斯今為虎亭鎮也

丹水三日絕不流

箋按地理志上黨高都縣莞谷丹水所出東南入洙水水經注丹水東南

流入丹谷又東南逕鄆城西又西逕苑鄉城北屈逕其城南流注于沁謂之丹口竹書晉出公五年丹水三日絕不流即此水也一統志丹水在澤州城東北三十里舊號洙水源出高平縣西北仙公山南流合白水入沁河

七年齊人鄭人伐衛

箋按衛世家莊公出奔衛人立公子般師為衛君齊伐衛虜班師更

立公子起為衛君左傳注班師襄公孫服虔曰起靈公子又按齊人鄭人時為鄭聲公齊平公也

王陟

箋按六國表起自元王皆云元王八年崩今据竹書是七年崩也

貞定王

箋按世本貞王介崩子元王赤立周本紀元王崩子定王介立索隱曰如史記則元王是定王

父依世本則元王是貞王子必有一乖誤皇甫謐見此疑而不決遂彌縫史記世本之錯謬因謂貞定王今据竹書已作貞定王乃元王子則世本與索隱並謬也

元年癸酉於越徙都瑯琊

箋按吳春秋越王勾踐二十五年徙都瑯琊立觀臺以望

東海遂號令秦晉齊楚以尊輔周室瑯琊立觀臺以望起臺處括地志密州諸城縣東南百七十里瑯琊臺越王勾踐觀臺也瑯琊山在縣東南百四十里

四年十一月於越子勾踐卒是為莢執次鹿郢立

箋按禮坊

記曰春秋不稱楚越之王喪陳澹曰書卒不書莫夷之也史記索隱曰越在蠻夷少康之後地遠國小春秋之初未通上國史記微畧無世系故紀年稱為越子又按越世家勾踐卒子王鼫與立樂資春秋後傳曰越語謂鹿郢為鼫與也

六年晉河絕于扈

箋按郡國志管縣有扈成亭水經注河水又東北逕卷之扈亭北左傳文

公七年晉趙盾與諸侯盟于扈竹書晉出公二十二年河絕于扈即于是也又書傳多稱禹功告成之歲下逮周定王五年已未當魯宣公之七年而河遂東徙凡一千六百六十餘歲据竹書則定王五年為丁丑六年為戊寅河徙河絕皆在定王之世當魯哀公之時云宣公誤也

七年晉荀瑶城南梁

附注曰一本出公三十年○箋按南誤當作高郡國志平陽楊縣有

高梁亭水經注汾水西南逕高梁邑西故高梁之墟也竹書晉出公三十年知伯瑤城高梁今竹書是貞定王七年則是晉出公十三年也當是十三而訛為三十又按左傳哀二十七年晉荀瑤帥師伐鄭次于桐丘悼四年晉荀瑤帥師圍鄭韋昭曰智宣子晉卿荀躒之子申也瑤宣子之子智伯也謚曰襄子郡國志河東解縣注引博物記曰有智邑括地志故智城在蒲州虞鄉縣西北四十里

十年於越子鹿郢卒子不壽立

箋按鹿郢立六年卒据吳越春秋勾踐子興夷

孫不壽是鹿郢即興夷也

十一年晉出公出奔齊

箋按元王二年晉定公卒出公立則貞定王十一年正出公十

七年也晉世家出公十七年智伯與趙韓魏共分范中行氏以為邑出公怒告齊魯欲以伐四卿四卿恐

遂反攻出公出公奔齊
一本作出公二十年非

十二年河水赤三日

箋按京氏別對災異曰河水赤者獄有冤恨誅殺不當則致河水赤

也洪範五行傳曰赤者火色也水盡赤以火沴水也又張華博物志曰江河水赤名曰泣血

荀瑶伐中山取窮魚之丘

箋按左傳定四年荀寅曰中山不服中山名始見此史記

索隱曰中山故鮮虞國姬姓也

隋圖經曰中山城在今唐昌縣東北三十一里水經注涑水東逕廣昌縣

故城南又東北逕西射魚城東南而東北流又逕東射魚城南竹書荀瑶伐中山取窮魚之丘窮射字相

類疑即此城也

十三年晉韓龐取秦武城

箋按地理志武城縣屬左馮翊春秋文公八年秦人伐晉

取武城豈秦先取之晉晉又復取之秦耶又按水經注洛水逕盧氏縣故城南竹書晉出公十九年晉韓龐取龍氏城有盧氏川水注之朱謀瑋箋云今竹書云晉韓龐取盧氏城則郡注龍氏乃盧氏之謠而此本作武城者誤也秦蓋秦厲公也

十六年

晉出公二十二年○箋按史記六國年表三晉滅知伯在周定王十六年上距獲麟二十七年

皇甫謐曰元王十一年癸未三晉滅知伯据竹書則元王七年陟不得十一年也又按晉世家晉哀公四年趙襄子韓康子魏桓子共殺知伯盡并其地索隱曰如紀年之說此乃出公二十二年事又按秦本紀厲共公二十四年晉亂殺知伯分其國與韓趙魏二十五年知開與邑人來奔正義曰開知伯子與從屬來奔秦晉世家及秦本紀互相矛盾皆誤

十七年晉出公薨乃立昭公之孫是為敬公

箋按晉世家出公奔

齊道死知伯乃立昭公曾孫驕為晉君是為哀公趙世家知伯乃立昭公曾孫驕是為懿公年表出公十八年次哀公忌二年次懿公驕十七年皆自相矛盾今据竹書出公十七年奔齊又六年薨晉不應曠年無君年表晉世家皆有哀公忌是也此當是知伯所立定王十六年韓趙魏殺知伯于鑿臺之下明年立敬公則非知伯之所立明矣

十八年

已丑晉敬公元年○箋按晉世家哀公大父雍晉昭公少子也號戴子生忌忌早死乃立忌子

驕為君則世家懿公蓋即紀年之敬公也

二十年於越子不壽見殺是為盲姑次朱勾立

箋按越世家王

不壽卒子王翁立是朱勾即王翁也吳越春秋不壽之後為不揚是不揚又即朱勾也朱勾水經注作朱誤勾

二十二年楚滅蔡

楚按蔡世家蔡侯齊四年楚惠王滅蔡蔡遂絕祀

二十四年楚滅杞

楚按杞世家杞簡公春出公子也在位一年楚惠王四十四年滅杞班固

曰簡公為楚所滅弟他奔魯魯悼公給以采地為侯

二十八年

晉敬公十一年

王陟

楚按春秋成公五年冬十一月己酉定王崩

考王

楚按周本紀定王崩長子去疾立是為哀王哀王立三月弟叔襄殺哀王而自立是為思王思王立

五月少弟嵬攻殺思王而自立是為考王時考王封其弟于河南是為桓公以續周公之官職世本西周桓公名揭居河南東周惠公名班居洛陽蓋平王東遷以豐鎬為西周洛邑為東周至考王之後更以河南為西周顯王二年西周惠公封其少子班于鞏號為東周於是東周西周二周呂氏曰東西周各為列國不復相闕自是而後稱東西周者皆謂二周君也

元年庚子

晉敬公十二年

魏文侯立

箋按魏世家魏獻子生魏侈侈之孫曰魏桓子桓子之孫曰文侯都魏文侯元年秦靈公

之元年也與韓武子趙桓子周威王同時國策吳師道注魏文侯名勣元年威烈王二年丁巳今據竹書魏文侯初立在校王元年庚子是在威烈王之前十五年也又按漢高帝紀注臣瓚曰畢萬居魏昭子徙

安邑文侯亦居之是文侯不都魏也呂氏春秋文侯勝齊天子賞文侯以上聞水經注鄴本齊桓公所

置後屬晉魏文侯七年始封此地故曰魏漢高帝十二年置魏郡治鄴縣以此也

十年楚滅莒

箋按世本莒已姓括地志密州莒縣故國也楚世家簡王元年北伐滅莒

十一年晉敬公卒

箋按已丑元辛亥卒在位二十三年

十二年

晉幽公柳元年○箋按通鑑謂考王元年庚子晉幽公立止有絳曲沃二邑餘皆入于韓趙魏

今据竹書幽公之立非考王元年也

魯悼公卒

箋按魯世家魯哀公二十七年三桓攻公公奔于衛去如鄒遂如越國人迎哀公復歸卒

于有山氏子寧立是為悼公三十七年悼公卒

十四年魯季孫會晉幽公于楚丘

箋按僖二年城楚丘杜注楚丘衛邑不言

城衛衛未遷程畏齊曰楚丘魯地子貢詩傳曰僖公城楚丘以備戎史克頌之賦楚宮知楚丘非漕地矣僖二年城楚丘魯自城之也與書城中丘城郎城小穀之云同又水經濮水逕葭密縣故城北注曰竹書考王十四年魯季孫會晉幽公于楚丘即葭密遂城之時魯元公三年也地理志濟陽葭密縣一統志葭密城在曹州曹縣西北三十里是也又有楚丘城在歸德府城北四十里古戎州已氏之邑春秋隱七年戎伐凡伯于楚丘即是戎也而范甯注穀梁曰戎者衛也戎衛者謂其伐天子之使貶而戎之也楚丘衛之邑也此大繆矣

十五年王陟

威烈王

箋按周本紀考王崩子威烈王午立

元年丙辰

三年晉大旱地生鹽

箋按水經注畦水耗竭土自成鹽亦是類也

五年晉丹水出反潔

箋按水經注引竹書曰晉幽公九年丹水出相反擊則潔是擊之謠

也又按地理志上黨高都縣有莞谷丹水出此是晉丹水也上洛冢領山亦有丹水故以晉丹水別之

六年晉大夫秦嬴賊幽公于高寢之上

箋按大夫當作夫人秦嬴秦女

為晉夫人者晉世家幽公十八年幽公淫婦人夜竊出盜殺幽公索隱曰紀年云夫人秦嬴賊公于高寢之上是今本大夫誤也又按春秋定公十五年公薨于高寢穀梁傳曰高寢非正也說苑曰春秋壬申公

薨于高寢傳曰高寢者何正寢也諸侯正寢二一曰高寢始封君之寢也二曰路寢繼體君之寢也其二何子不居父之寢故二寢繼體君世世不可居高祖之寢故有高寢名曰高也又按周禮宮人掌王之六寢之修鄭注六寢者路寢一小寢五路寢以視事小寢以時燕息焉春秋書莊公薨于路寢僖公薨于小寢則諸侯不止于二寢矣

魏文侯立幽公子止

箋按晉世家魏文侯以誅晉亂立幽公子止是為烈公索隱曰系本

幽公生烈成公止年表云魏誅幽公立其弟止是史表誤也

七年

壬戌晉烈公元年

趙獻子城泣氏

箋按溫公通鑑曰趙襄子封伯魯之子于代曰代成君早卒立其子浣為趙氏

後襄子卒弟桓子逐浣而自立一年卒趙氏之人曰桓子立非襄主意乃共殺其子復迎浣而立之是為獻子地理志上黨泫氏縣應劭曰山海經泫水所出者也

韓武子都平陽

箋按地理志河東平陽縣韓武子元孫貞子居此世本作景子徙此又按韓世

家韓之先曰韓武子得封韓原後三世有韓厥是為韓獻子其子宣子名起徙居州子貞子名頃徙居平陽又四傳至武子名啟章仍都平陽是韓之先後有兩武子讀漢志者易以滋疑也

八年趙城平邑

箋按地理志平邑屬代郡趙世家趙獻侯十三年城平邑後漢書注曰代郡有

平邑今魏郡昌樂縣東北又有平邑城

九年楚人伐我南鄙至于上洛

箋按此云楚人楚簡王時也戰國策楚魏戰于

陘山魏許泰以上洛以絕秦與楚地理志上洛縣屬弘農郡水經注晉分為郡地道記曰郡在洛上故以名為名

十一年田公子居思伐邯鄲圍平邑

箋按風俗通曰陳完字敬仲陳厲公

之子也厲公為蔡所滅殺國內亂完奔于齊始食田采姓田氏焉田居思疑即是齊策田臣思也水經注河水故瀆逕昌樂縣故城又東北逕平邑郭西竹書晉烈公四年趙城平邑五年田公子居思伐趙鄆圍平邑者也按是時齊為宣公

十二年於越子朱勾伐郟以郟子鵠歸

箋按左傳昭公十四年郟子來

朝郟子曰吾高祖少昊摯之立也杜注少昊金天氏黃帝之子已姓之祖也索隱按紀年於粵子朱勾三

十四年滅滕三十五年滅
鄭地理志東海郟縣故國

十四年於越子朱勾卒子翳立

箋按索隱曰紀年云朱勾三十七年卒又按淮

南子曰越王翳逃山穴越人薰而出之遂不得已据莊子此乃越王無顯之事非翳也

十六年齊田盼及邯鄲韓舉戰于平邑邯鄲之師敗逋

遂獲韓舉取平邑新城

箋按齊策盼子謂齊王注曰盼子田盼也威王臣蓋即此田盼

矣括地志平邑故城在魏州昌樂縣東北四十里後魏地形志高陽郡有新城縣二漢晉曰北新城前漢屬中山後漢屬涿郡即此新城也又漢地理志代郡平邑秦本紀莊襄王三年蒙驁攻趙榆次新城括地志新城亦名小平城在朔州鄆陽縣西南四十里驚所攻也

十七年魏文侯伐秦至鄭還築汾陰郃陽

箋按括地志汾陰故城在

蒲州汾陰縣北九里此汾陰誤汾當作洛魏世家魏文侯十七年西攻秦至鄭而還築雒陰郃陽正義曰

雒漆沮水也城在水南郃陽郃水之北括地志雒陰在同州西郃陽故城在同州河西縣南地理志京兆

鄭縣鄭桓公邑魏文侯伐秦至鄭而還即此按是時為秦簡公

田悼子卒

箋按田完世家田莊子卒子太公和立索隱按紀年齊宣公十五年田莊子卒明年立田

悼子悼子卒乃次立田和是莊子後有悼子而世家不錄據莊子及鬼谷子並云田成子殺齊君十二代

而有齊國世家自成子至王建之滅祗十代若如紀年則悼子及侯剌即有十二代與莊子鬼谷說同明

紀年非妄也紀年齊康公二十二年田侯剌立與悼子合數為十二也

田布殺其大夫公孫孫公孫孫以廩丘叛于趙

變按水經注

河之北即廩丘縣也王隱晉書地道記曰廩丘者春秋之所謂齊邑矣實表東海者也竹書晉烈公十一

年田悼子卒田布殺其大夫公孫公孫以廩丘叛于趙朱謀瑋曰今竹書作田布殺其大夫公孫孫公孫

孫以廩丘叛于趙是皆誤也既云公孫孫見殺又何從復以廩丘叛于趙乎今據齊世家齊宣公五十一年

年田會反廩丘索隱引紀年宣公五十一年公孫會以廩丘叛于趙則下公孫孫乃公孫會之謫地理志

東郡有廩丘縣

田布圍廩丘翟角趙孔肩韓氏救廩丘及田布戰于龍

澤田師敗逋

變按趙世家趙敬侯三年救魏于廩丘大敗齊人即是事也又按水經注河水東逕

鐵丘南河之西岸有竿城郡國志曰衛縣有竿城者也河南有龍淵宮元光中河決濮陽武帝起宮于決河之旁龍淵之側故曰龍淵宮據此則龍澤蓋即爲龍淵矣又按地里志廩丘濮陽並屬東郡

十八年王命韓景子趙烈子及我師伐齊入長垣

王威按

烈王也外紀云威王十六年王命韓趙伐齊入長城據竹書則威王十八年也又按韓景子名虔武子之子趙烈子名籍獻子之子敬侯之父也依此則上年救廩丘者乃趙烈侯世家云敬侯誤也長垣即長城蘇氏曰齊有長城巨防呂氏春秋曰魏文侯東勝齊於長城天子賞文侯以上聞蓋即是年也又按通鑑綱目曰王命晉韓啟章趙浣伐齊入長垣不審啟章乃韓景子父浣乃趙烈子父以竹書較之蓋皆誤也又按伐齊在齊康公之二年

二十三年王命晉卿魏氏趙氏韓氏為諸侯

箋按周本紀威烈王

二十三年九鼎震命韓趙魏為諸侯蓋春秋之季晉有范氏中行氏知氏是為六卿後三家為韓魏趙所滅三分晉地而有之至是魏斯趙趙籍韓虔始請命于天子為諸侯司馬溫公作資治通鑑始于年胡三省曰上距春秋獲麟七十八年距左傳趙襄墓知伯事七十一年

二十四年王陟

安王

箋按周本紀威烈王崩子安王驕立古今人表云元安王驪

元年庚辰

九年晉烈公卒子桓公立

附注曰韓非子作桓侯○箋按晉世家烈公卒子孝公順

立世本云孝公傾欣綱目作孝公傾
今紀年作桓公是與韓非子同也

十年己丑

晉桓公頃元年○箋按漢紀高祖曰命乃在
天雖扁鵲何益李奇曰名越人魏桓侯時醫

也臣瓚曰魏無桓侯師古曰瓚說是也今据
竹書及韓子李奇諸說瓚云無桓侯非也

十五年魏文侯卒

附注在位五十年○箋按考王元年
庚子魏文侯初立安王十五年甲午

文侯卒實在位五十五年晉世家文侯三
十八年卒附注云在位五十年皆未詳也

大風晝昏

箋按荊州占曰凡霧氣四方俱起百步不見
人曰昏開元占經曰天色晦冥雲氣昏濁風

聲寒慘是謂災風又曰魏惠成王元年晝晦十六年
邯鄲四隄室多壞民多死然竹書在武侯元年前

一年安王
十五年也

晉太子喜出奔

箋按晉太子喜當是晉桓公子也而世家年表不載

十六年

乙未魏武侯擊元年○箋按韓詩外傳曰魏文侯有子曰擊次曰訴訴少而立之以為嗣封擊

於中山三年莫往來其傅趙倉唐諫曰何不遣使乎則臣請使擊曰諾於是遂求北犬晨雁齋行倉唐至曰北藩中山之君再拜獻之文侯曰嘻擊知吾好北犬嗜晨雁也即見使者文侯曰中山之君亦何好乎對曰好詩文侯曰於詩何好對曰好晨風文侯曰晨風謂何對曰詩云鷓鴣彼晨風鬱彼北林未見君子憂心欽欽如何如何忘我實多此自以忘我者也於是文侯大悅曰中山君不賢烏能得賢傅遂廢太子訴召中山君以為嗣劉向說苑曰文侯遣倉唐賜太子衣一襲令鷄鳴時至太子迎拜賜發篋衣盡顛倒太子曰欲召擊也詩曰東方未明顛倒衣裳顛之倒之自公召之

封公子緩

箋按魏世家云
公中緩中音仲

二十一年韓滅鄭哀侯入于鄭

箋按韓世家韓哀侯二
年滅鄭曰徙都鄭索隱

曰紀年魏武侯二十一年韓滅鄭哀侯入于鄭二十
二年晉桓公邑哀侯于鄭今據竹書韓滅鄭在周安

王二十一年魏武侯六年又按鄭世家鄭君乙二十
一年韓哀侯滅鄭蓋索隱誤記為魏武侯之二十一
年也其云魏武侯二十二年
晉桓公邑哀侯于鄭亦誤也

二十三年於越遷于吳

箋按索隱据紀年云越王翳三
十三年遷于吳今考是三十二

年

二十六年王陟

魏城洛陽及安邑王垣

箋按洛陽疑當作汾陽地理志河南洛陽是為成周春秋昭二

十一年晉合諸侯大成周之城以居敬王此豈待魏武侯始城者太原有汾陽當是其所城耳又河東有安邑縣魏絳自魏徙此有垣縣徐廣曰垣縣有王屋山故曰王垣魏世家武侯三年城安邑王垣括地志王垣在絳州垣縣西北二十里

七月於越太子諸咎弑其君翳

箋按索隱曰紀年云翳三十六年七月太子諸

咎弑其君翳又按夏之符姑孰備攷安王二十六年越世子諸咎弑其君翳葬之大橫山之下是時越遷于長干也

十月越人殺諸咎越滑吳人立孚錯枝為君

箋按越世家王翳卒

子王之侯立是之
侯即季錯枝也

烈王

箋按周本紀安王崩子烈王喜立
古今人表云夷烈王喜元安王子

元年丙午

魏公子緩如邯鄲以作難

箋按魏世家初武侯卒也子
營與公中緩爭為太子公孫

順自宋入趙自趙入韓謂韓懿侯曰魏營與公中緩
爭為太子君亦聞之乎今魏王得王錯挾上黨固半
國也因而除之破魏必矣懿侯說乃與趙成侯合軍
并兵以伐魏戰于濁澤魏氏大敗胡三省注通鑑曰
解縣濁澤近于魏都又按稽古錄韓趙敗魏于濁澤
遂圍魏趙欲弑懿侯立公中緩割地而退韓欲兩分之
趙不可韓怒以其師夜去
趙師亦歸魏營遂滅緩

於越大夫寺區定越亂立初無余是為莽安

箋按索隱曰紀年大

夫寺區定越亂立初無余是初無余即王之侯也
据吳越春秋王侯自稱為君當即為王之侯也

二年秦胡蘇帥師伐韓韓將韓襄敗胡蘇于酸水

箋按胡蘇

一作蘇胡是蓋秦獻公時也水經注濮水逕酸棗縣故城南又東逕胙亭東南又東與酸棗故瀆會酸瀆首受河于酸東縣東逕酸棗城北延津南竹書韓襄敗秦蘇胡于酸水者也

魏觴諸侯于范臺

箋按魏策梁主魏嬰觴諸侯于范臺酒酣請魯君舉觴魯君興避席擇言

梁主稱善相屬嬰史作瑩諸侯索隱按紀年謂魯恭侯宋桓侯衛成侯鄭釐侯也

晉桓公邑哀侯于鄭

箋按韓滅鄭八年晉桓公始邑之于鄭資治通鑑曰烈王元年韓滅

鄭因徙都之皆誤又按初學記注韓貞子初都河北之平陽哀侯徙焉東自豫許畧汝鄧而西得河南府之陽翟福昌新安盡韓地也

韓山堅賊其君哀侯

箋按六國表韓哀侯六年韓嚴殺其君資治通鑑烈王五年韓嚴遂

弑哀侯國人立其子懿侯初哀侯以韓龐為相而愛嚴遂二人甚相害也嚴遂令人刺韓龐于朝走哀侯竹書韓嚴嚴遂即山堅實一人也

六年

辛亥梁惠成王元年

韓共侯趙成侯遷晉桓公于屯留

以後更無晉事○箋按韓無共侯當即是

懿侯年表懿侯作莊侯是皆謫也趙世家趙成侯十六年與韓魏分晉封晉君以端氏趙肅侯元年奪晉

君端氏徙處屯留今據紀年徙屯留即趙成侯也地理志端氏屬河東屯留屬上黨

趙成侯偃韓懿侯若伐我蔡

名種此云偃異又按水經

注司馬彪曰山陽有鄆城京相璠曰河南山陽西北六十里有鄆城竹書魏惠成王元年趙成侯偃韓懿

侯若伐我蔡者也

七年王陟

箋按趙策周烈王崩諸侯皆弔齊後至周怒赴于齊

我師伐趙圍蜀陽

箋按伐趙當作伐韓地理志韓分晉得南陽郡及潁川之長社陽翟郡

國志潁川長社有蜀城有蜀津水經注潁水枝渠東逕曲強東皇陂水注之皇陂即古長社縣之濁澤也其陂水北對鷄鳴城即長社縣之濁城也濁陽益韓地故魏伐韓而圍之若伐趙何由圍蜀陽乎

齊田壽師師伐我圍觀觀降

箋按田完世家齊威王九年敗魏于濁澤而圍惠王

惠王請獻觀以和解徐廣曰年表云伐魏取觀今之衛縣也正義曰按濁澤蓋誤當作觀澤年表云魏哀

王二年齊敗我觀澤今据竹書是惠王二年非哀王也

魏大夫王錯出奔韓

箋按呂氏春秋吳起治西河王錯

也魏世家公孫頤謂韓曰魏瑩得王錯徐廣引紀年惠王二年魏大夫王錯出奔韓是也

竹書統箋卷十一

欽定四庫全書

竹書統箋卷十二

翰林院檢討徐文靖撰

顯王

箋按周本紀烈王崩弟扁立是為顯王帝王世紀作顯聖王

元年癸丑鄭城邢丘

附注自此韓改稱曰鄭。箋按韓詩外傳武王伐紂到邢丘更名邢

丘曰懷左傳宣六年亦狄伐晉圍懷及邢丘杜注邢

丘今河內平臯縣水經注曰昔晉侯送女于楚送之

邢丘即是處也竹書梁

惠成王三年鄭城邢丘

秦子向命為藍君

箋按水經注霸水北歷藍田川還藍田縣北竹書梁惠成王三年秦子向

命為藍君益子
向之故邑也

二年河水亦于龍門三日

箋按趙世家成侯八年與韓分周以為兩徐廣曰顯王二

年即是年也京房妖占曰河水赤下民恨貞定王二十二年河水亦三日周景王十四年河水赤于龍門三里今赤于龍門三日則又不止三里矣地理通釋曰河至慈州文城縣孟門山是為入龍門至絳州汾水合河之上是為出龍門其地總謂之龍門也

三年公子景賈帥師伐鄭韓明戰于韓我師敗逋

箋按水經

注濮渠之側有漆城或亦謂之濮苑城春秋甯武子與衛人盟于苑濮杜預曰長垣西南近濮水也竹書梁惠成王五年公子景賈帥師伐鄭韓明戰于陽我師敗逋澤北壇陵亭亦或謂之大陵城非所究也据

此則戰于陽者當是濮陽而今本則戰于韓蓋濮陽本衛地至是而屬之韓也

四年夏四月甲寅徙都于大梁

按地理志陳留浚儀故大梁魏世家惠王三

十一年秦用商君東地至河而齊趙數破我安邑近秦於是徙治大梁水經注大梁本春秋之陽武高陽鄉也於戰國為大梁周梁伯之居竹書梁惠成王九年四月甲寅徙都于大梁孫奭孟子疏亦引竹書紀年梁惠成王九年徙都大梁漢高祖紀注臣瓚引汲冢古文魏惠王六年自安邑遷於大梁與今本合

王發逢忌之藪以賜民

按哀十四年傳宋皇野語左師向巢曰迹人來告逢澤有介

廩馬地理志河南開封縣逢池在西北或曰宋之逢澤也臣瓚曰汲郡古文梁惠王發逢忌之藪以賜民今浚儀縣有逢陂忌澤是水經注魯溝水流逕開封縣故城北南際富城東南入百尺陂即古之逢澤

也

於越寺區弟思弑其君莽安次無顓立

箋按莊子曰越人三世弑其君

王子搜患之逃乎丹穴不肯出越人薰之以艾乘以王與樂資曰號曰無顓是無顓即子搜也庾信周步

陸郢碑既遭燹穴翻從壓紐謂此

五年雨碧于郢

箋按山海經耿山多水碧柴桑潯陽其下多碧說文碧石之青美者天鏡曰天

雨石兵喪萬民亡又按楚世家文王熊貲始都郢杜預曰今南郡江陵縣北紀南城是括地志平王更城郢在江陵縣東北六里荊州記昭王十年吳通漳水灌紀南入赤湖進灌郢城遂破楚則此郢與紀南為二者蓋指平王所城之郢而言也但顯王六年雨黍于齊此不言雨碧于楚則似非楚郢据周書敘惟王

李宅程史記正義引周書敘惟王李宅郢孟子謂文王生于郢郢字亦作郢郢故城在咸陽東二十里則雨畢于郢者或此也故不言楚楚宣王時也

地忽長十丈有餘高尺半

箋按地鏡曰地無故自長如丘隴室屋其上或生草木皆

失地亡民山海經廣注漢元帝時臨淮徐縣地踊長五六里高二丈與此正同

六年我師伐郢郢取列人

箋按地理志廣平國有列人縣水經注漳水過斥丘縣即

裴縣又東北逕列人縣故城南竹書梁惠成王八年伐郢郢取列人者也

我師伐郢郢取肥

箋按地理志真定國有肥累縣春秋肥子之國水經注白渠歷郢溝縣故

城東又東逕肥鄉縣故城北竹書梁惠成王八年伐郢郢取肥者也

雨黍于齊

箋按易飛侯曰天雨黍為政者去大人出死他國三年國有死將此亦齊威王時也

七年我與邯鄲趙榆次陽邑

箋按地理志榆次陽邑並屬太原郡本魏地也魏惠

王九年與趙秦本紀莊襄王三年蒙
驚攻趙榆次新城是後為趙地也

王會鄭釐侯于巫沙

箋按水經注濟水榮澤中北流至
衡雍西又南會榮澤至垂隴城濟

澤出其北又有沙城城左佩濟濟竹書梁惠成
王九年王會鄭釐侯于巫沙者濟際有故城也

八年入河水于圃田又為大溝而引圃水

箋按水經注
渠水自河與

濟亂流東逕榮澤北歷中牟縣之圃田與陽武分水
西限長城東極官渡北佩渠水東西四十里許南北
二百里許中有沙岡上下二十四浦水盛則北注渠
溢則南播竹書梁惠成王十年入河水於圃田又為

大溝而引圃水者也一統志大溝在尉氏縣西南一十五里東北合康溝入于黃河爾雅鄭有圃田本鄭地而後入于魏

瑕陽人自秦導岷山青衣水來歸

箋按晉有二瑕左傳郇瑕氏之虛京相璠

曰河東解縣西南五里有故瑕城文公十二年秦侵晉及瑕十三年晉侯使詹嘉處瑕西征記陝州太原倉北臨大河周迴六里即晉詹嘉所處之瑕也瑕陽人不知何屬無所考也華陽國志曰有沫水從西來出岷江又從岷山西來合郡下青衣江入大江水經青衣水出青衣縣西蒙山東與沫水合道元注曰縣故有青衣羌國也竹書紀年梁惠成王十年瑕陽人自秦導岷山青衣水來歸者也一統志青衣水出雅州廬山縣東南流至雅州合沫水經名山縣至嘉定州入大江蓋魏瑕陽人為秦導岷青衣水至是始自

秦來歸若魏地逼近大河
安用導青衣水來歸哉

九年秦師伐鄭次于懷城殷

按秦孝公時也郡國志懷屬河內有懷城括地志

故懷城在懷州武陟縣西十一里水經注朱溝水自枝渠東南屈逕州城東又東逕懷城又東逕殷城竹書秦伐鄭次于懷城殷者也

十年楚師出河水以水長垣之外

按水經注河水舊于白馬縣南決通濮

濟黃溝故蘇代說燕曰決白馬之口魏無黃濟陽竹書梁惠成王十九年楚師出河水以水長垣之外者也陳留風俗傳縣有長垣故縣氏之

龍賈帥師築長城于西邊

按秦本紀魏築長城自鄭蒲洛以北有上郡正義曰魏

界與秦相接南自華州鄭縣西北過渭水濱洛水東岸向北有上郡鄜州之地皆隸以界秦境洛即漆沮水也以在魏西故曰隸長城下西邊也魏世家惠王十九年隸長城塞固陽即此也水經注以郡國志長城自卷逕陽武到密為龍賈隸長城于西邊謬矣

鄭取屯留尚子

箋按地理志屯留長子並屬上黨郡水經注漳水東會于梁水北流至長子縣

故城南竹書梁惠成王十二年鄭取屯留尚子則尚子即長子之異名也春秋襄十八年晉人執孫蒯于此也純留即此也

十一年鄭釐侯使許息來致地平丘戶牖首垣諸邑及

鄭馳地

箋按春秋昭公十三年諸侯盟于平丘杜注平丘在陳留長垣縣西南左傳哀公十三年會于

黃池吳人因子服景伯而遷及戶牖歸之杜注戶牖陳留外黃縣西北東昏城是趙世家肅侯七年公子刻攻魏首垣水經注濮水又東逕韋城有馳道屬于長垣濮渠東絕馳道逕長垣縣故城北衛地也故首垣矣按馳地是馳走車馬之中道孔仲達曰馳道如今之御道也

我取枳道

箋按趙世家蘇厲說趙王曰齊韓西師以禁秦使秦反溫枳高平于魏注曰溫枳皆河內

蘇秦列傳秦正告魏曰我下枳道南陽封其索隱曰枳是河內枳縣言道者亦衍字今据竹書云我取枳道是河內枳亦稱枳道也括地志故枳城在懷州濟源縣東南三十里

與鄭鹿

箋按韓哀侯滅鄭徙都鄭韓因改稱為鄭此鄭即韓也水經注黎陽縣故城黎山在城西竹書

梁惠成王與鄭鹿即是城也今城內有臺尚謂鹿鳴臺又謂之鹿鳴城王元謨自滑臺走鹿鳴者也

王及鄭釐侯盟于巫沙以釋它陽之圍

箋按它當作宅
魏世家惠王五

年與韓會宅陽竹書晉出公六年齊鄭伐衛荀瑶城
宅陽字當作宅水經注秦昭王四十二年魏冉攻魏
走芒卯入北宅即故宅陽城也竹書惠王十三年盟
于巫沙以釋宅陽之圍者也括地志宅陽故城在鄭
州滎陽東南十七里又按一統志河間府阜
城縣有宅陽城一名沙丘春秋時晉東陽地

歸釐于鄭

箋按水經注河溢為滎濟水受焉北濟也濟
水又東南逕釐城東春秋經書公會鄭伯于

時來左傳所謂釐也京相璠曰今滎陽縣東四十里
有故釐城春秋地名考畧曰今開封東四十里有釐
城蓋釐本鄭邑魏取
之至是復歸于鄭也

十二年魯恭侯宋桓侯衛成侯鄭釐侯來朝

箋按魯恭
侯名奮魯

穆公子史記作共公宋桓公名辟兵宋休公子衛成侯名速衛聲公子鄭釐侯名武鄭懿侯子即韓昭侯也韓策謂之昭釐侯

於越子無顓卒是為莢蠋卯次無彊立

莢按索隱曰無顓之弟胡三省

曰自勾踐至無彊凡六世據吳越春秋勾踐卒子興夷即位一年卒子翁立卒子不揚立卒子無彊立勾踐至無彊僅五世也竹書無彊上有王之侯及無顓凡七世則吳越春秋誤也又無彊水經注及稽古錄並作無彊非

十三年邯鄲成侯會燕成侯于安邑

箋按趙成侯名種趙敬侯子燕成侯

名載燕孝侯子地
理志安邑屬河東

十四年秦公孫壯伐鄭圍焦城不克

箋按顯王十四年秦孝公十一年也

水經注後水東北流逕宛陵縣故城北東流北逕焦城東陽丘亭西謂之焦溝竹書秦公孫壯帥師伐鄭

圍焦城不克即焦城也

秦公孫壯帥師城上枳安陵山氏

箋按秦謂秦孝公時也通鑑赧王二十六

年秦大良造白起客卿錯伐魏至枳取城大小五十

六胡三省曰枳縣班志屬河內郡唐為孟州濟源縣

又按郡國志京兆霸陵有枳道亭是秦地有兩枳故

因以河內為上枳也地理志潁川有雋陵縣李奇曰

六國時為安陵郡國志汝南有安陵亭注曰即魏安

陵君所封水經注後水自陽丘亭東流逕山氏城北

為高榆澗竹書秦公孫壯帥

師城上枳安陵山氏者也

邯鄲伐衛取漆富兵城之

箋按水經注酸水逕燕城北又東逕滑臺城南又東南會

于濮濮渠之旁有漆城竹書梁惠成王十六年邯鄲伐衛取漆富兵城之者也謝注曰兵當作邱又伐衛

在衛聲公時也

齊師及燕戰于洵水齊師遁

箋按齊威王及燕文公時也水經注鮑丘水自雍奴

縣故城西北又東與洵河合水出右北平無終縣西山白楊谷東逕平谷縣之缺城南又東南逕臨河城竹書梁惠成王十六年齊師及燕戰于洵水齊師遁即是水也

十五年齊田期伐我東鄙戰于桂陽我師敗遁

箋按國策蘇子

謂魏曰魏東與齊境又齊伐魏東鄙戰于桂陽在周顯王十四年邯鄲之師敗魏于桂林在周顯王十六

年總為齊田期所敗水經注桂陽亦曰桂陵大抵在桂水之北故曰桂陽

東周與鄭高都

箋按趙世家趙成侯七年與韓攻周八年與韓分周以為兩徐廣曰顯王二年

則東周復有東西之分始此蓋以自考王封弟揭于河南是為桓公桓公傳威公惠公是為西周惠公公復封其少子班于鞏曰東周惠公立長子曰西周武公惠公卒子傑嗣武公卒子文成嗣則此與鄭高都者正東周惠公時也史記音義曰河南新鄭縣有高都括地志高都故城在洛州伊闕縣北又按國策曰雍氏之役蘇代謂周君曰代能為君令韓不徵粟與甲于周又能為君得高都遂往見韓相公仲而與高都是高都卒歸周也

鄭釐侯來朝中陽

箋按韓策或謂鄭王曰申不害之計事曰夫弱魏之兵而重韓之權莫如

朝魏昭釐侯聽而行之即謂此也又按水經注太水出太山之陽東南流注于役水東北逕武陵城西又北逕中陽城西竹書梁惠成王十七年鄭釐侯來朝中陽者也今據竹書在十五年也

宋景鼓衛公孫倉會師圍我襄陵

箋按田完世家魏惠王圍邯鄲趙求救于

齊驕忌曰不如勿救段干朋曰不如南攻襄陵以敝魏于是成侯言威王使田忌南攻襄陵時宗衛復會師以圍之當必齊使之也司馬溫公稽古錄周烈王四年為衛聲公宗辟公元年史記世家聲公十一年卒子成侯立辟公三年卒子剔成公立則圍魏襄陵者正宗剔成衛成侯時也鮑彪注國策曰襄陵屬河東魏邑也攻之使魏困史記正義曰襄陵故城在兗州鄒縣非

十六年王以韓師諸侯師縣于襄陵

箋按以韓師諸侯師一作以諸侯韓

師誤蓋魏懲前此襄陵之圍因以縣之

齊侯使楚景舍來求成

箋按水經注梁惠成王十八年齊侯使楚景舍來求成公會齊

宋之圍蓋求成謂通好也隱元年傳惠公之季年敗宋師于黃公立而求成焉林氏曰魯宋始通好命是也

邯鄲之師敗我師于桂林

箋按資治通鑑曰顯王十五年魏惠王伐趙邯鄲楚王使

景舍救趙十六年齊威王使田忌救趙十月邯鄲降魏師還于齊戰于桂林魏師大敗括地志桂林在曹州乘氏縣東北二十一里

秦伐韓閼與惠成王使趙破之

附注不知是何年○箋按魏世家如耳謂

魏王曰昔者魏伐趙斷羊腸拔閼與約斬趙趙分為
二所以不亡者魏為從主也括地志閼與山在磁州
武安縣西南二十里徐廣曰武安在邯鄲西北當是
趙之閼與但此是魏伐趙非秦伐韓也戰國策無忌
謂魏王曰夫越山踰河絕韓上黨而攻強趙是復閼
與之事秦必不為也史記索隱曰秦韓相攻閼與而
趙奢破秦軍郡國志上黨涅縣縣有閼與聚此當是
韓之閼與但秦師伐韓而趙奢破之非顯王時事溫
公稽古錄周赧王四十五年秦人伐趙圍閼與趙奢
救之大破秦師與魏惠成王無涉故附注謂不知何
年也

十七年燕伐趙圍濁鹿趙靈王及代人救濁鹿敗燕師

于勺

箋按燕文公時也水經注博水出望都縣東南流
逕其縣故城南又東南逕三梁亭南疑即古勺梁

也竹書燕人伐趙圍濁鹿趙武靈及代人救濁鹿師于勺梁者也今廣昌東嶺之東有山俗名之濁鹿以此推之或近是矣朱謀瑋曰古本作敗燕于勺燕竹書但云敗燕師于勺吳琯改作勺梁是也又按溫公稽古錄周烈王元年趙成侯元顯王十七年猶是趙成侯也後三年為趙肅侯元年又四十年趙肅侯薨武靈王即位則此時救濁鹿者當猶是趙肅侯也史記趙世家趙伐魏在肅侯十一年於竹書為周顯王二十七年安得十年之前為靈王救濁鹿乎或靈王此時已能將兵故命之救也

晉取玄武獲澤

附注即雷澤舜漁處○箋按地理志河東有獲澤縣初學記引墨子曰舜漁于

雷澤在獲澤縣西穆傳天子四日休于獲澤郭注曰今平陽獲澤縣是也獲澤故城在今澤州陽城縣西二十里又項羽本紀漢王封項氏有桃侯平臯侯玄武侯桃平臯皆邑則玄武亦必邑名可知

十八年齊築防以為長城

箋按襄十八年傳諸侯伐齊齊侯禦諸平陰塹防門而守

之廣里杜注平陰在濟北盧縣東北其城南有防防有門于門外作塹防橫行廣一里史記蘇秦列傳燕王曰吾聞齊有長城足以為塞信有之乎正義引竹書紀年梁惠王二十年齊閔王築防以為長城今據齊記曰齊宣王築長城東至海西至濟州以備楚其實非也此築防為長城者猶威王也顯王三十七年始為齊宣王元年

十九年王如衛命公子南為侯

箋按水經注汲郡古文謂衛將軍文子為子南

彌牟其後有子南勁紀年勁朝于魏後魏惠成王如衛命子南為侯秦本紀昭襄王九年魏公子勁為諸侯索隱曰別封之邑比之諸侯魏當作衛字謫也又按韓非子曰衛子南勁之為其臣也上信君下亂治

援外以撓內侵下以謀上今觀魏惠王如衛命
子南為侯則援外撓內侵下謀上從可知矣

二十年

二十一年魏殷臣趙公孫襄伐燕還取夏屋城曲逆

按

伐燕燕文公時也呂氏春秋趙襄子上于夏屋以望
代俗其樂甚美高誘曰夏屋代之南山也漢地理志
太原廣武縣賈屋山在北即夏屋又中山國曲逆縣
章帝醜其名改曰蒲陰水經注濡水蒲陰縣西東逕
其縣故城南枉渚迴湍率多曲復亦謂之為曲逆水
也張晏曰濡水于城北曲而西流故曰曲逆濡水又
東得蒲水口蒲水逕安陽關下出關北流又東逕夏
屋故城實中險絕竹書魏殷臣趙公孫襄伐燕還取
夏屋城曲
逆者也

二十二年壬寅孫何侵楚入三戶鄆

箋按侵楚楚宣王時也郡國志南陽

丹水縣有三戶亭左傳哀公四年晉執蠻子與其五大夫以畀楚師于三戶者也水經注浙水出浙縣西北盧氏縣大嵩山又歷其縣東而南流入丹水縣注于丹水丹水又東南逕一故城南名曰三戶城一統志三戶城在鄆州內鄉縣西南

楚入徐州

箋按入一本作伐楚策曰齊魏戰于馬陵齊大勝魏魏王召惠施告之對曰王若欲報齊

乎不如因變服折節而朝齊田嬰許諾遂內魏王而與之並朝齊侯再三楚王怒自將而伐齊大敗齊于徐州史記索隱曰徐音舒左氏作舒說文作邠在薛縣正義曰在勃海郡東平縣也

二十三年魏章帥師及鄭師伐楚取上蔡

箋按楚世家懷王十七年

悉兵襲秦戰于藍田大敗楚軍韓魏聞楚之困乃南襲楚至于鄧潛夫論曰上蔡北有古鄧城是也地理志汝南有上蔡縣應劭曰以九江有下蔡故曰上蔡又按春秋取國邑十有六趙子曰凡力得之曰取

孫何取潁陽

按水經注潁水出潁川陽城縣東南逕臨潁縣西北小潁水出焉潁水又東逕潁

陽城北又東逕潁彊縣故城南正應為潁陰而有潁陽之名者明在南猶有潁水故以陽名

秦孝公會諸侯于逢澤

按秦孝公名渠梁秦獻公子也地理志開封縣有逢池在西

北即逢澤也秦世家孝公二十年諸侯畢賀秦孝公使公子少官率師會諸侯于逢澤朝天子秦策魏拔邯鄲因退為逢澤之遇皆是地也後漢西羌傳秦孝公雄強威服羌戎孝公使太子駘率戎狄九十二國

朝周顯王

正一時事

絳中地塿西絕于汾

箋按考異郵曰臣恣地裂圻漢舍孽曰大夫專權兵陵地拆水經注

汾水又經絳縣故城北竹書梁惠成王二十五年絳中地塿西絕于汾汾水西逕廐祁宮北橫水有故梁

截汾水中凡三十柱

二十四年魏敗韓馬陵

箋按韓世家韓懿侯二年魏敗我馬陵正義曰在魏州元城縣

東南一里

二十五年穰庇帥師及鄭孔夜戰于梁赫鄭師敗遁

箋按

穰庇一本作穰庇從庇者考工記車人為來庇鄭音棘刺之刺從庇者漢書霍去病傳封雁庇為煇渠侯顏師古音匹履反又一作穰苴水經注渠水東至浚儀縣東南逕大梁東南逕赤城北竹書梁惠成王二

十八年穰苴帥師及鄭孔夜戰于梁赫鄭師敗逋即
是城也朱謀埒曰穰苴疑誤今本竹書作穰庇實皆
誤也據呂氏春秋無義篇曰秦惠王疑衛鞅之為人
欲加罪焉鞅以其私屬與母歸魏襄庇不受襄庇當
即是穰庇也又酈注赤城疑是荑城說
酈嬾真子云漢太守荑荑乃赫赫也

與齊田盼戰于馬陵

箋按田盼魏策作田盼丁度集韻
盼與盼同陳完世家魏伐趙趙與

韓親共擊魏趙不利戰于南梁韓氏請救于齊齊因
起兵使田忌田嬰將孫子為帥救韓趙以擊魏大敗
之馬陵今據竹書田嬰誤當作田盼又按馬陵徐廣
以為在魏郡元城史記正義曰虞喜志林馬陵在濮
州鄆城縣東北六十里有陵澗谷深峻可以置伏索
隱曰孫子滅竈退軍三日行至馬陵大破魏軍當如
虞說上云太子為上將軍過外黃則從汴州外黃退
至濮州東北六十里也時趙韓共擊魏戰南梁韓急

請救于齊齊師走大梁敗魏馬陵豈合
更渡河北至魏元城哉徐說定非也

二十七年五月齊田盼及宋人伐我東鄙圍平陽

地按

志山陽郡有南平陽縣水經注泗水又南過平陽縣
西即山陽郡之南平陽縣也竹書梁惠成王二十九
年齊田盼及宋人伐我東鄙圍平陽者也按魏收地
形志高平郡有平陽縣二漢晉曰南平陽漢屬山陽
晉屬
高平

九月衛鞅伐我西鄙

按一本九月下有秦字藝文志
商君二十九篇名鞅姬姓衛後也

秦本紀秦孝公二十九年衛鞅擊魏
呂氏曰孝公取河西地蓋商鞅之力

十月邯鄲伐我北鄙

按國策蘇秦說魏王曰梁南與
楚境西與韓境北與趙境東與齊

曉卒戍四方守亭障者不下十萬又按地理志趙國邯鄲縣趙敬侯自中牟徙此後遂稱趙為邯鄲趙世

家趙肅侯十

一年趙伐魏

王攻衛鞅我師敗逋

箋按呂氏春秋無義篇公孫鞅為秦將而攻魏魏使公子卬當之卒

罷軍鞅使人謂公子曰願與公子坐而相去別也公子相與坐鞅因伏卒與車騎以取公子卬

二十八年城濟陽

箋按水經注濟水自武父城北東逕濟陽故城北竹書魏惠成王三十年城

濟陽者也案當是二十八年地理通釋曰漢陳留郡濟陽縣唐省入宛句建隆四年為濟陽鎮

秦封衛鞅于鄔改名曰尚

箋按水經注斯浚水又東逕樂信縣故城南地理志鉅鹿

屬縣也又東入衡水衡水又北逕鄔縣故城東竹書梁惠成王三十年秦封衛鞅于鄔改名曰商据此則

竹書改名曰尚尚即商也商君列傳衛鞅既破魏還秦封之於商十五邑號曰商君於讀為烏古字通穆天子傳於鵲與處即烏鵲是也於商二縣名正義曰鄧州內鄉東七里古於邑商洛在商州東本商邑

二十九年邳遷于薛

箋按括地志故薛城古薛侯國也在徐州滕縣界左傳定元年薛宰

曰薛之皇祖奚仲居薛以為夏車正奚仲遷于邳仲虺居薛以為湯左相則是邳先遷薛後遷邳至是而又遷薛也索隱引紀年曰下邳遷于薛改名曰徐州徐音舒洪容齋曰薛自奚仲受封歷夏商及周末始為宋偃王所滅享國千九百餘年傳六十四代

三月為大溝于北郭以行圃田之水

箋按水經注魏惠王三十一年為大

溝于北郭以行圃田之水陳留風俗傳曰縣北有浚水余謂故汴沙陰溝矣一統志圃田澤在中牟縣西

北七里今為澤者八若東澤西澤之類為陂者三十
有六若大灰小灰之類其實一也圃田大溝在尉氏
縣西南十五里入有長明溝源出長葛縣界經尉氏
縣西南匯為大陂東南與大溝合流一統志大溝又
東北合康溝入河

三十年

三十一年秦蘇胡帥師伐鄭敗蘇胡于酸水

附注曰不知何年附

此○箋按秦胡蘇伐鄭見烈王二年此重出誤

三十二年

箋按稽古錄云秦惠王元年

三十三年鄭威侯與邯鄲圍襄陵

箋按韓世家韓昭侯卒子宣惠王立十一

年君號為王索隱曰紀年鄭昭侯武薨次威侯立威侯七年與邯鄲圍襄陵是宣惠王即鄭威侯也漢志陳留襄邑縣師古曰圍稱云襄邑亦地本承匡襄陵鄉也宋襄公所葬故曰襄陵

三十四年魏惠成王三十六年改元稱一年

箋按魏世家惠王三

十六年復與齊王會甄是年惠王卒索隱按紀年云惠王三十六年改元稱一年未卒也

王與諸侯會于徐州

箋按魏世家惠王卒子襄王立襄王元年與諸侯會徐州相王也追

尊父惠王為王又孟嘗君傳齊宣王九年田嬰相齊

宣王與魏襄王會徐州而相王也楚威王聞之怒田

嬰明年楚伐敗齊師于徐州皆誤以魏惠王改元之

一年為襄王元年也稽古錄曰顯王三十五年魏後

元魏惠王齊威王會于徐州以相

王與紀年合威王誤當作宣王

於越子無彊伐楚

箋按越世家王無彊時越興師北伐齊西伐楚與中國爭彊當楚威王之

時越北伐齊齊威王使人說越王曰越不伐楚大不王小不伯願大王之轉楚也於是越遂釋齊而伐楚

時蓋楚威王也

三十五年楚得吾帥師伐鄭圍綸氏

附注曰不知何年附此○箋按一本

師下有及秦字地理志綸氏縣屬潁川水經注伊水逕當階縣西大狂水入馬水出陽城縣大嵒山又西逕綸氏縣故城南竹書楚得吾帥師伐鄭圍綸氏者也

三十六年楚圍齊于徐州遂伐於越殺無彊

箋按越世家無彊伐

楚楚威王興兵伐之大敗越殺王無彊盡取故吳地至浙江北破齊於徐州索隱曰案紀年越王無顓臈

後十年楚伐徐州無楚敗越殺無彊之語是無彊為
無顯之後紀年不得錄也今据竹書楚殺無彊之後
尚有四十六年而紀年乃終安得謂紀年不得錄乎
又吳越春秋無彊子玉王子尊尊子親親失瑯琊為
楚所滅勾踐至王親歷八主稱霸二百二十四年而
紀年止越無彊史記天官書越之亡熒惑守斗蓋是
年事也蔡如松曰越王勾踐至無彊七世
唐書世系表無彊子蹄更封于歐餘山陽

三十八年龍賈及秦師戰于雕陰我師敗逋

箋按地理志上郡雕

陰縣雕山在西北魏世家襄王五年秦敗我龍賈軍
四萬五千于雕陰圍我焦曲沃予秦河西之地資治
通鑑曰秦使犀首伐魏大敗其師四萬餘人禽將龍
賈取雕陰然此時龍賈正未擒也秦本紀惠文王十
年公子卬與魏戰虜其將龍賈豈有兩龍賈而兩被
虜耶當依紀年云龍賈及秦師戰于雕陰我師敗逋

是此時無擒龍賈事也又按蘇代曰龍賈之戰岸門之戰封陵之戰高商之戰趙莊之戰秦之所殺三晉之民數百萬今其生者皆死秦之孤也

王會鄭威侯于巫沙

箋按索隱曰紀年鄭威侯七年與邯鄲圍襄陵五月梁惠王會威侯

于巫沙今按鄭圍魏襄陵在顯王三十三年魏會鄭巫沙在三十八年相距凡六年非威侯七年五月事也

三十九年秦取我汾陰皮氏

箋按秦本紀惠文君八年魏納河西地九年渡河取

汾陰皮氏地理志汾陰皮氏並屬河東郡

四十年

四十一年秦歸我焦曲沃

箋按檇甘列傳秦惠王八年爵檇里子右更使將而伐曲

沃盡出其人取其城地入秦又按魏世家魏襄王五年秦圍我焦曲沃八年秦歸我焦曲沃据竹書則魏惠王復元之六年也水經注河水東逕湖縣故城北又南留水注之西北逕曲沃城南諸著述者咸言曲沃在北此非也余按春秋文公十三年晉侯使詹嘉守桃林之塞處此以備秦以曲沃之官守之故曲沃之名遂為積古之傳矣河水又東得七里澗澗在陝城西北七里城即虢邑之上陽虢仲之所都為南虢其大城中有小城故焦國也武王以封神農之後于此括地志焦在陝城東百步因焦水為名曲沃在陝州縣西南三十二里因曲沃水為名又按稽古錄顯王四十一年秦公子華張儀伐魏取蒲陽儀言于惠王復以予魏亦

是年事也

四十二年九鼎淪泗沒于淵

箋按秦本紀昭襄王五十一年西周君盡獻其邑三

十六城口三萬五十二年周民東亡其器九鼎入秦漢郊祀志周赧王卒九鼎入于秦或曰周顯王四十二年宋太丘社亡而鼎淪沒于泗水彭城下又漢吾丘壽王曰昔秦始皇親出鼎于彭城而不能得則九鼎淪沒于泗而未嘗入秦可知史記曰秦取九鼎寶器而遷西周公于愚狐正義曰赧王十九年秦昭王取九鼎一飛入泗水餘八入於秦皆失寶也

四十三年

箋按趙肅侯薨子雍立是為武靈王

四十四年

箋按稽古錄是年秦始稱王時惠王即位十三年也明年改為後元年

四十五年楚敗我襄陵

箋按楚世家懷王六年楚使上柱國昭陽將兵而攻魏破之于

襄陵得八邑郡國志河東襄陵縣晉武公自曲沃徙此括地志襄陵在晉州臨汾縣東南三十五里又按

春秋書法詭道而勝之曰敗

四十六年

箋按稽古錄是年燕衛皆稱王趙武靈王獨不肯曰無其實敢有其名乎今國人謂已為

君

四十七年

箋按通鑑顯王四十七年秦張儀自蠶桑還而免相相魏欲令魏先事秦而諸侯效之魏

王不聽

四十八年王陟

慎靚王

箋按周本紀顯王崩子慎靚王定立

元年辛丑秦取我曲沃平周

箋按地理志河東聞喜縣故曲沃晉武公自晉陽徙

此入西河有平周縣十三州志曰古平周在汾州介休縣西四十里魏世家襄王十三年秦取我曲沃平周今据竹書在慎觀王之元年魏惠王之後元十六年通鑑云在周顯王四十七年張儀相魏之年皆誤也

二年魏惠成王薨

箋按呂氏春秋開春篇梁惠死葬有日矣天大雨雪至牛目羣臣多諫太

子請弛期更日不許惠施曰昔王李歷葬渴山之尾樂水畱其墓見棺前和文王曰謫先君必欲一見羣臣百姓也于是出而為之張朝羣臣百姓皆見之而後更葬此文王之義也太子曰甚善敬弛期更擇葬日又吳淑雪賦葬滕文而弛期注引孟子曰滕文公卒葬有日矣天大雨雪至牛目請弛期不許是孟子

與滕文

之篇

三年今王元年

箋按世本魏襄王名嗣惠成王子一名

又按史記作哀王据孟子見梁惠王之後即云見梁襄王趙岐注曰襄謚也魏之嗣王也是史記哀王為誤

四年

箋按魏王因張儀以請成于秦張儀復歸相秦

五年

六年鄭使韓辰歸晉陽及向

箋按晉語曰襄王賜晉文南陽陽樊之田陽人不服

倉葛曰陽人未狎君德隱十一年傳注杜氏曰野王縣西南有陽城又十三州志軹縣南山西曲有故向

城地理通釋曰范曄傳泰昭王三十二年東伐韓少曲高平拔之括地志高平故城在懷州河陽縣西北四十里周桓王以予鄭韓滅鄭有其地至是復歸之晉也

二月城陽向更名陽為河雍向為高平

箋按徐廣曰紀年云魏哀王二

十四年改宜陽曰河雍改向曰高平今據紀年但云城陽向為知為宜陽也沉陽向並在河內其必非宜陽明矣至以襄王為哀王承史遷誤又按周本紀慎靚王立六年崩歲在丙午紀年不載王陟闕文也

隱王

附注曰史記作赧王名延蓋赧隱聲相近○箋按皇甫謐曰赧王名誕赧非謐謐法無赧正以微弱

竊鉄逃債赧然故名曰赧耳又漢書諸侯王表自幽平之後日以陵夷分為二周有逃債之臺被竊鉄之言服虔曰周赧王負債無以歸之主迫責急乃逃于此臺後人因以名之劉德曰洛陽南宮諺臺是也

元年丁未

鄭宣王來朝

附注曰梁○箋按來朝朝梁也韓世家宣惠王即鄭威侯十一年始號為王索隱曰

紀年鄭威侯七年五月梁惠王會威侯于巫沙十月鄭宣王來朝今據紀年魏惠王與威侯會巫沙在顯王三十八年鄭宣王來朝在赧王二年當魏襄王之五年相距凡十有七年是索隱誤也

燕子之殺公子平不克

箋按燕世家燕王噲立大信子之鹿毛壽謂燕王不如以國讓

子之子之南面行王事三年國大亂將軍市被與太子平謀將攻子之不克因搆難數月衆人恟恐齊因伐燕大勝燕年表云君噲及太子皆死据竹書云燕子之殺公子平不克是年表誤也

齊師殺子之醢其身

箋按燕世家齊大勝燕子之亡二年燕人共立太子平是為燕昭王

索隱曰案年表云噲及太子相子之皆死紀年又云子之殺公子平今此云立太子平是為燕昭王則年表紀年為謬也然紀年謂燕子之殺公子平不克索隱遺不克字而云殺公子平何謬也裴駢案汲冢紀年擒子之而醢其身與此正同又齊人伐燕孟子以為宣王時史記六國表燕王噲及子之死在湣王十年溫公稽古錄據竹書紀年周顯王三十七年為齊宣王之元年則隱王元年為齊宣王十九年是年齊師殺子之與孟子合孟子慎靚王三年見梁襄王而去梁之齊纔三四年則正齊宣王十八九年國策載儲子謂宣王宜仆燕正儲子為相時也王令章子將兵以伐燕正孟子與遊時也朱子據史記以梁惠王三十五年孟軻至梁不審其至梁在惠王改元之末年當在慎靚王一二年間而轉疑溫公通鑑以伐燕在宣王十九年孟子去齊已久安得見其取之復畔也因云未詳所據大事記以赧王元年孟子致為臣

于齊則紀年實
與孟子合也

二年齊地景長大餘高一尺

箋按赧王元年齊湣王地
元年也周髀算經陳子曰

夏至南萬六千里冬至南十三萬五千里日中立竿
測景周髀長八尺易氏祗曰夏至日在南陸躔東井
去極六十六度有奇而景尺有五寸冬至日在北陸
躔牽牛去極一百六十度有奇而景丈有三尺春分
日在西陸躔於婁秋分日在東陸躔於角去極九十
一度有奇而其景均焉今齊地景長隋史袁充奏隋
興已後日景漸長亦是類也淮南子
曰景修則陰氣勝景短則陽氣勝

魏以張儀為相

箋按呂氏春秋曰張儀魏氏餘子也高
誘曰大夫庶子為餘齊策犀首以梁戰

于承匡而不勝張儀謂梁王不用臣言以危國王因
相儀魏世家襄王十三年張儀相魏魏有女子化為

文夫

三年韓明帥師伐襄丘

箋按水經注濮渠水東逕須城北衛詩云思須與曹也又北逕

襄丘亭南竹書襄王七年韓明帥師伐襄丘據稽古錄

竹書少

一年

秦王來見于蒲坂關

箋按秦本紀惠文王後元三年張儀相魏五年王遊至北河則此時

道經蒲坂故襄王見于蒲坂關也地理志河東蒲反故曰蒲秦更名應劭曰秦始皇東巡見長坂故加反

云今按紀年作長坂已在始皇前也

四月越王使公師隅來獻舟三百箭五百萬及犀角象

齒

菱按越世家楚威王興兵伐越殺王無彊而越以此
散諸族子爭立或為王或為君濱于江南海上据竹
書周顯王三十六年越無彊為楚所滅又十二年顯
王陟慎覲王立六年陟赧王三年越人來獻舟三百
距無彊滅二十一年矣是此越王者必無彊之子若
孫也水經注引紀年曰越王使公師陽來獻乘舟始
罔及舟三百箭五百萬與今本小異說文象長鼻牙
南越之大獸三歲一乳又字說象齒感雷莫之為而
文生通雅象大者六牙爾雅九府南方之美者有梁
山之犀象馬交州記犀有二角鼻上角長額上角短
或曰三角者水犀也二角者山犀也埤雅曰南人以
象牙為白暗犀角為黑暗言難別也杜詩黑暗通蠻
貨

五月張儀卒

菱按魏世家襄王五年子秦河西地戰國
策摎留謂韓王曰魏兩用犀首張儀而西

河之外亡儀卒在襄王七年史記云十年誤又稽古
錄曰周赧王五年秦武王元張儀與秦武有隙乃去
秦相魏遂卒于魏据竹書儀
卒在赧王三年非五年也

四年翟章伐衛

箋按舊本作四月誤魏世家魏哀王八
年伐衛拔列城二衛君惠之如耳見衛

君曰請罷魏兵免成陵君可乎衛君曰先生果能孤
請世世以衛事先生据紀年正襄王八年事云哀王
誤伐衛事在
衛嗣君八年

魏敗趙將韓舉

箋按韓世家宣惠王八年魏敗我將韓
舉索隱曰案此則舉是韓將不疑而紀

年云韓舉趙將蓋舉本趙將後入韓也今据竹書韓
趙各有一韓舉非一人先在趙而後入韓也先時齊
田盼戰于平邑獲邯鄲韓舉當威烈王十四年後十
年王陟歷安王二十年烈王七年顯王四十八年慎

魏王六年又加隱王三年相距凡九十四年魏復敗韓舉豈仍為一人乎又按韓世家文侯七年伐齊至桑丘趙世家肅侯二十三年韓舉與齊魏戰死于桑丘則趙之韓舉死矣此當是鄭將如韓世家之所說不得云趙將也又按地理志秦山郡有桑丘則桑乃桑之譌

五年洛入成周山水大出

箋按水經注周書稱周公將致政乃作大邑成周于中土

南繫于洛水竹書魏襄王九年洛入成周

六年十月大霖雨疾風河水酸棗

箋按爾雅久雨謂之淫淫雨謂之霖春秋

隱九年三月癸酉大雨霖以震是也述異記曰耆舊說周秦間河南雨小棗遂生野棗今酸棗縣是也郡國志酸棗即鄭康延之地水經注濮水出酸棗縣首受河竹書魏襄王十年十月大霖雨疾風河水溢酸

棗郭括地志酸棗故城在

滑州酸棗縣北十五里

楚庶章帥師來會我次于襄丘

楚按莊公三年傳凡師一宿為舍再宿為信過

信為次

七年翟章救鄭次于南屈

附注曰此年未的○楚按晉語驪姬賂二五使言于公曰

蒲與二屈君之疆也韋昭曰二屈屈有南北今河東有北屈則是時復有南屈地理志北屈縣注應劭曰有南故稱北臣瓚曰汲郡古文翟章救鄭至于南屈又按春秋提要曰伐而書次其次為善伐楚次陰是也救而書次其次為貶聶北救邢是也

八年秦公孫爰帥師伐我皮氏

楚按鄆甘列傳秦昭王元年鄆里子將伐蒲胡

衍為蒲謂鄆里子曰夫衛之所以為衛者以蒲也今
伐蒲入于衛衛必折而從之害秦而利衛王必罪公
於是遂解蒲而去還擊皮氏按皮氏古國名見周穆
王太史公史記括地志皮氏在絳州龍門縣西北三
十里

翟章帥師救皮氏圍疾西風

箋按魏策曰秦楚攻魏皮氏魏太子在楚謂樓子于

鄆陵曰公必且待齊楚之合也以救皮氏今齊楚之
理必不合矣乃謂樓里子曰攻皮氏此王之首事也
而不能拔天下且以此輕秦且有此皮氏于以攻韓
魏利也鄆里子曰吾已合魏矣無所用之魏世家秦
來伐我皮氏未拔
而解是其事也

九年城皮氏

箋按周顯王三十九年秦取魏汾陰皮氏
時皮氏屬秦二十四年矣至是魏復據皮氏

氏故秦園之卒解圍未
拔而去故襄王城之

十年

十一年

十二年秦拔我蒲坂晉陽封谷

按括地志蒲城在蒲州河東二里晉陽故城

在蒲州虞鄉縣西史記正義曰封陵在古蒲坂縣西
南河曲之中蓋近平陽地也秦本紀秦昭襄王十一
年齊韓魏趙宋中山共攻秦秦與韓魏河北及封陵
以和蘇秦列傳秦正告魏曰我下軹道南陽封冀索
隱曰封封陵也魏世家秦伐我蒲
坂晉陽封陵紀年封谷即封陵也

十三年邯鄲命吏大夫奴遷于九原

按地理志五原郡有九原縣史記

索隱曰秦曰九原漢武帝改五原郡郡縣志五原謂龍遊原乞地十原青嶺原奇嵐正原橫槽原又曰敬本古城在中受降城北四十里賈耽古今述曰地理求之前代九原郡城也方輿紀要曰九原今榆林衛西北七百餘里廢豐州境是一統志九原縣在大同府西北四百二十里奴與拏同趙策腹拏對主父曰臣羈旅也宮室小而拏不衆是拏遷之證也

將軍大夫適子代史皆貂服

按韓非子初見秦曰代四十六縣漢高帝詔曰代

地居常山之北與夷狄邊趙乃從山南有之趙世家武靈王封長子章為代安陽君則代史謂安陽君史也將軍大夫適子水經注引紀年作大吏趙世家趙武靈王十九年春正月大朝信宮遂之代北至無窮西至河登黃華之上召樓緩謀曰吾欲胡服使王綈告公子成寡人胡服將以朝也乃賜胡服明日服而

朝趙策牛進諫武靈王曰昔先君襄王與代交地城境封之名曰無窮之門所以昭後而期遠也水經注隆慮縣有黃水出于神囷山黃華谷北崖劉劭趙都賦置酒乎黃華之館蓋謂此也淮南子主術訓曰趙武靈王貝帶鷁鷁而朝趙國化之高誘注武靈王以大貝飾帶胡服鷁鷁讀曰私鉤二字三晉曰郭洛帶係鉤鉤也貂胡產也史記貨殖傳狐貂裘千皮說文貂鼠屬大而黃黑出胡丁零國通典俞祈國少牛馬多貂鼠徐廣曰北方寒以貂皮煖額附施于冠因為首飾

十四年

十五年薛侯來會王于釜丘

箋按索隱曰紀年以為梁惠王後元十三年四月齊

威王封田嬰于薛十月齊城薛十四年薛子嬰來朝則此會王釜丘者蓋田嬰也水經注曰地理志定陶

有陶丘墨子以為釜丘也竹書魏襄王十九年薛侯來會王于釜丘者也又釜丘一本作答丘誤

楚入雍氏楚人敗

箋按楚兩圍雍氏一在赧王三年一在赧王十五年周策曰雍氏之役韓

微栗與甲於周蘇代說韓相公仲不徵甲與栗於周楚卒不拔雍氏而去蓋赧王三年事也大事記曰韓襄王十二年太子嬰死公子咎公子蟻亟爭為太子時蟻亟質於楚楚欲內之遂圍雍氏史記甘茂傳楚懷王以兵圍韓雍氏韓使公仲侈告急於秦秦昭王新立太后楚人不肯救甘茂言於秦昭王王乃下師於穀以救韓楚兵去徐廣曰紀年於此亦說楚景翠圍雍氏韓宣王卒秦助韓共敗楚屈丐此蓋赧王十五年事也韓世家以景翠之圍在三年誤矣郡國志潁川陽翟有雍氏城括地志故雍氏城在洛州陽翟縣東北二十六里羅泌路史曰雍氏城在冀州堂陽縣東北三十六里羅革注曰杜云陽翟東北有雍氏

城者非此又
羅氏之誤也


十六年與齊王會于韓

箋按前年有楚師之圍今又有公子爭立之案故魏齊二王會

韓以安
定之

今王終二十年

箋按和嶠曰紀年起於黃帝終於魏之今王今王者魏惠成王之子



竹書統箋卷十二